

Saksprotokoll i Utval for kultur, idrett og regional utvikling - 15.02.2017

Olav Kvinge (H) sette fram slikt forslag til vedtak nytt pkt. 7:

« Kvinnherad er i mildaste kategori for bygging i strandsona og det bør speilast/visast i planen. Strandsona er ein viktig ressurs som det er viktig å ivareta heilskapleg og langsiktig. Funksjonell strandsonavavgrensing opnar for differensiering bygd på kartlegging og dokumentasjon av strandsoneverdiar. Kvinnherad kommune har vist ny byggjegrænse i plankartet basert på funksjonell strandsonavavgrensing men samanhengar med strandsonekartlegginga går ikkje fram av planmaterialet. Det gjer heller ikkje grunngjevinga for avsette område til naust, bryggjer, flytebryggjer og moloar. Planen bør dokumentere og grunngje byggjegrænsa og tiltaka i strandsona. Bygging av naust og fritidsbustadar, kan gjere det meir attraktivt å busetje seg i Kvinnherad.

Rosalind Fosse (Frp) sette fram slikt forslag til vedtak:

«11 Nokre LNF-spreidd område bør avgrensast:

a. Austlege del av LNFS-01-07 Skarvatun, grunna tidlegare motsegn i kommunedelplan.

Nokre areal for småbåthamn bør avgrensast eller takast heilt ut:

f. Småbåthamn Sm-03-06 bør avgrensast grunna automatisk freda kulturminne id. 212354 og det samla kulturmiljøet. Skal det opnast for tiltak må det stillast plankrav.

g. Austlege del av småbåthamn Sm-15-01 bør reduserast grunna nærføring til freda bygg og kulturmiljø.»

Røysting

Fylkesrådmannen sitt forslag pkt. 1 til 6 vart samrøystes vedteke.

Fylkesrådmannen sitt forslag pkt. 7 vart vedteke med 8 røyster (A, Krf, Sp og V) mot 5 røyster (H og Frp).

Fylkesrådmannen sitt forslag pkt. 8 til 10 vart samrøystes vedteke.

Fosse sitt forslag pkt. 11a fekk 2 røyster(Frp) og fall mot fylkesrådmannen sitt forslag som fekk 11 røyster.

Fylkesrådmannen sitt forslag pkt. 11b vart vedteke med 8 røyster mot 5 røyster (Frp og H).

Fylkesrådmannen sitt forslag pkt.11 c, d og e vart samrøystes vedteke.

Fylkesrådmannen sitt forslag pkt. 11 f vart vedteke med 8 røyster mot Fosse sitt forslag som fekk 5 røyster (Frp og H).

Fylkesrådmannen sitt forslag pkt. 11 g vart vedteke med 8 røyster mot Fosse sitt forslag som fekk 5 røyster (Frp og H).

Vedtak

- 1 Hordaland fylkeskommune ser det som viktig og positivt at Kvinnherad kommune rullerer arealdelen av kommuneplanen og får ein arealdel med felles planskildring, plankart og føresegnar for heile kommunen inkludert sjøareala. Den heilskaplege og tilgjengelege kartløysinga som er utarbeidd for arealdelen er ei god og framtidretta løysing som legg til rette for god medverknad, informasjonsdeling, innsyn og einsarta sakshandsaming.
- 2 Planskildringa er ein vesentleg juridisk del av plandokumentet, og bør tydlegare drøfta behov, mål og strategiar for lokalisering av bustader, fritidsbustader, næring og areal for naust og småbåthamn.
- 3 Dei regionale interessene for folkehelse og barn og unge sine interesser kunne vore tydelegare

utgreidd og vektlagt. Mineralforvaltning er i stor grad ivaretatt gjennom arealdelen til kommuneplanen.

- 4 Hordaland fylkeskommune meiner akvakultur i stor grad er ivaretatt i planframlegget. Fleksibilitet for eksisterande akvakulturanlegg er sikra på ein god måte. Hordaland fylkeskommune rår til at akvakulturområde som ikkje er egna til laks og aure vert vidareført då desse kan nyttast til andre artar og produksjonsformer.
- 5 Planframlegget bør i større grad følge opp Regional plan for attraktive senter i Hordaland for å fremja attraktive senter, livskvalitet, robust næringsliv og miljøvenleg transport. Planen bør innehalda:
 - Definisjon av senterstruktur i kommunen i samsvar med regional plan.
 - Omtale og vurdering av trong for handelsareal.
 - Omtale av sentrumsutstrekning, særleg viktig for regionsenteret Husnes.
 - Plankrav for sentrumsområda.
- 6 Planframlegget opnar for omfattande utbygging av bustad, fritidsbustad, næringsføremål og naust innafor føremålet spreidd utbygging av landbruks-, natur og friluftsområde (LNF). Føresegnene gjev lite styring med arealbruk og samfunnsutvikling. Fylkeskommunen meiner regionale interesser for samordna areal og transport, kulturminne og kulturmiljø, og forvaltning av strandsone, landskap og friluftsiinteresser ikkje vert godt nok ivaretatt. Omfanget av spreidd utbygging i LNF-område bør reduserast.
- 7 Strandsona er ein ressurs som det er viktig å ivareta heilskapleg og langsiktig. Funksjonell strandsonavgrensing opnar for differensiering bygd på kartlegging og dokumentasjon av strandsoneverdiar. Kvinnherad kommune har vist ny byggjegrænse mot sjø i plankartet basert på funksjonell strandsonavgrensing, men samanhengen med strandsonekartlegginga går ikkje fram av planmaterialet. Det gjer heller ikkje grunngevinga for avsette område til naust, bryggjer, flytebryggjer og moloar. Planen bør dokumentera og grunnkje byggjegrænse og tiltaka i strandsona.
- 8 Alle tiltak i LNF-Spreidd område skal sendast Hordaland fylkeskommune ved Fylkeskonservatoren for vurdering i høve til potensial for funn av automatisk freda kulturminne. Det er knytt motsegn til dette punktet. Motsegn fell bort dersom dette vert teke inn i dei felles føresegnene til planen.
- 9 Der det er lagt inn nye naustføremål utan plankrav, nye småbåthamner, nye område for bruk og vern av sjø og vassdrag, samt nye eller endra bruk av akvakulturføremål skal alle tiltak sendast Hordaland fylkeskommune ved Fylkeskonservatoren og Bergens Sjøfartsmuseum for vurdering i høve til kulturminne i sjø og potensial for funn av slike. Det er knytt motsegn til dette punktet. Motsegn fell bort dersom dette vert teke inn i dei felles føresegnene.
- 10 Det er nokre manglar i kommuneplankartet når det gjeld omsynssoner for kulturminne. Opplysingar om desse er lagt ved og må rettast opp. Det er knytt motsegn til dette punktet. Motsegn fell bort når manglane er retta.
- 11 Nokre LNF-spreidd område bør avgrensast eller takast heilt ut:
 - a. Austlege del av LNFS-01-07 Skarvatun, grunna tidlegare motsegn i kommunedelplan.
 - b. LNFS-12-01 Indre Matre, reduserast nord for vegen grunna svært stort potensial for funn av automatisk freda kulturminne.

- c. LNFS-04-12 bør gå ut grunna nærføring til Malmanger prestegard som er freda.
- d. Den delen av LNSF-06-04 som omfattar Fjellandsbø bør gå ut grunna kulturlandskap og kulturmiljø.
- e. LNSF-15-01 på Fjellbergøy bør avgrensast slik at det ikkje omfattar den søre del av området ved Fjeldberg prestegard.

Nokre areal for småbåthamn bør avgrensas eller takast heilt ut:

- f. Småbåthamn Sm-03-06 bør avgrensast eller takast heilt ut grunna automatisk freda kulturminne id. 212354 og det samla kulturmiljøet. Skal det opnast for tiltak må det stillast plankrav.
- g. Austlege del av småbåthamn Sm-15-01 bør takast ut eller reduserast grunna nærføring til freda bygg og kulturmiljø.